

情慾緣想害之之謂也人若去妄任其超塵離法混俗而不凡獨立而不改抱一而不離周行而不怠於仙道其庶乎顏子有坐忘之德孟軻有養素之功蓋亦專於一事也今舉其大綱開諸異說所謂同歸而殊途名多而理一示之可以益於後學能使道心堅固真正無私若執志待終則位標仙籍永作真人神通萬變羽化飛昇矣如是則非我門而不入非我道而不然然而然於不然而然也大定十八年歲在戊戌仲冬望後六日自序

太古集卷之一

廣寧子都 大通 撰

周易參同契簡要釋義并序

教者道之所以生也道本無名彊名曰道教本無形假言顯教教之精粹備包有無故以無言之存乎道體以有言之存乎器用體之以為無用之以為利若曰有形生於無形則乾坤安從而生用教化於無知則真知安從而出若夫太極肇分三才定位布五行於玄極列八卦於空廓發揮七政躡次紀綱垂萬象於上方育羣靈於下土是故聖人仰觀俯察裁成輔相信四時而生萬物通變化而行鬼神通精無門藏神無穴寂然不動感而遂通至於修真達道之士用之德化十方慧超三界升沉而龍吟虎嘯消息而蛇隱龜藏一往一來神號而鬼哭一伸一屈物我以俱忘當是時電激而八表騰輝雷震而三山動色鶴飛鳳舞鹿返羊迴沖氣盈盈瑞雲密密萬神羅列羣魔遁形玄珠迸落於靈臺芝草齋

生於紫府覺花綻放法海淵深直入玄都永超陸地所謂毛吞大海芥納須彌木馬嘶鳴石人唱和此皆開悟後覺不得已而為言是道也用之以順兩儀序而百物和行之以逆六位傾而五行亂非夫至極玄妙其孰能與於此乎於是略叙玄文刪為節要云耳時大定十八年歲次戊戌孟夏十有九日序

易之道以乾為門以坤為戶以北辰為樞機以日月為運化以四時為職宰以五行為變通以虛靜為體以應動為用以剛柔為基以清淨為正以雲雨為利以萬象為法以品類為一以吉凶為常以生死為元以有無為教故知教之與化必在乎人體之善用必在乎心變而又通必在乎神以

一神總無量之神以一法包無邊之法以一心統無數之心自古及今綿綿若存是謂周易參同契簡要釋之義也

天體道廣  
清虛廣遠純陽不雜

乾用德普

運行不息應化無窮

善始嘉通

會合群靈通理物性

義和貞固

協和濟利堅固貞正

大妙至哉

法此行道隨時變通

玄元聖祖

規矩後人光澤天下

資乎萬物

衆象之宜資取乾用

統御雲雨

雲氣流行雨澤施布總及萬靈無有塵蔽

克明初末

克明萬物終始之道始則潛伏終則飛躍

時乘六戶

可潛則潛可飛則飛是明達乎始終之道

陽有六則陰有六則健用隨時始終如一

若不以時而用者應潛則飛應飛則潛應

生而殺應殺而生六位不以時乘而反害矣

伏虎飛龍

陰伏陽飛陽生陰殺

式宙控宇

升降不怠運轉無窮

變力化功

應用之道蓋故從新為之以漸謂之變一

有一無忽然而改謂之化言乾之為道使

物漸變者使物卒化者莫非資始生養萬

物總統隱顯之功

性端命輔

乾之為用見乎變化變化之功使物各正

性命性者天生之質若剛柔遲速之別命

者人所稟受若貴賤壽夭之屬故知無形

生於有形有形之所累也惟天道有形能

健而不為所累者蓋謂乘變化而御大器

靜專動直不失大和乾之為體靜住之時

則專一不轉移也其運動之時正直不傾

邪也不失大和直非正性命之情者邪乾

能正定物之性命物之性命各有情也所

稟生者謂之性隨時念慮謂之情故以真

言之存乎其性以邪言之存乎其情情去

性存命自歸而輔之

保合太和

乾之為用純陽剛暴若無和順則物不得

利又失其正若能保安合會太和之道乃

能永固使物各正性命而久長也

利貞通甫

貞固幹用利益於物

剛專柔直

內則存乎剛健專一不移轉也外則用手

柔弱正直不傾邪也

匠衆規矩

君子所以能行此道匠成萬物教化無窮

者也

君子自強

運用不休終而復始強而又壯君子之道

備矣君者主也子者愛也主臨上位愛人

濟物學道之者通乾用而行大和晝夜不

息無有虧退君子之人自強勉力不有止  
息惟施於眾

教令可取

此明君子之人體道用事內剛外順靜專  
動直若雲行雨施四時以序萬物以生一

切群品無不周普

地體道大

沈實純厚無所不載

坤用德隆

○ 柔和厚載包容眾垢以順羣生通理物情

猶乾之德其德隆大

長益羣品

長養利益羣靈品類始生萬有各得通暢

事備曲通

順時待物屈已伸人

攸改君子

柔順幹正嘉美之功

雌極化雄

不為事始待唱乃和謙尊卑先已若進人

必人進已先雌而化雄也

西南不利

陰柔不立物有所害

東北立功

志意和同性行柔弱臨事決斷不有私曲

正此義也

乘此達彼

得正順志利保守常

黃委宗風

惟政是從隨時渝變

資生萬有

妙用宏闊無所踈遠

承順天聰

行不違禮柔順不邪

厚能載物

至順包承不亂羣也

至理無窮

居中得正任其自然

含弘光熾

和光同眾俯仰不獨

品類熙沖

和氣沖滿物得生存言善則速道歸群品  
始終不懈君子之正

實相非相

依尊履正行命有功返視內觀相實非有

非相之實實非相故

真空不空

不居任不造為空真不存不空之真真不

空故

全其眾妙

質素不奢修仁守正

器與玄同

清淨精潔固志在一恢弘博施中正不偏

安乎得失變通隨時成其道果

太古集卷之一

友十

十三